

## Mona mažė katėnelė

Vėina gražė gegožė mienėsė dėina mona katė Mīcė atsėvedė pėnkis mažus, dėdlė dailius katėnelius. Anėi bova vėsai aklė. Po nedielės katėnelė atsėmerkė, pradiejė railiuotė po sava gorbieli. Katė mostās apkīriejė anus gaudītė, dėltuo po vėina pradiejė neštė mums i truoba. Babūnė nalėda. Kėta dėina ana vėstėik vākus parvėlka i kėima ė pakavuojė po kvietkuom. Tumet mes sopratuom – Mīcė nuor, ka ė mes džiaugtomemies anuos vākās. Pataisim minkšta vėita varanduo, atėtvierim, ka anėi niekor neišrailiuotom. Vo kuoki tumet bova kontėna anū muotina!..

Vėsa šeima lioubam veizietėis, kap anėi dailė žaid. Dėdlė išdīkės bova vėins rīžos katėnioks. Ons bova pats dėdiesis – grėtā pradiejė lėptė lauk ėš sava gorbielė. Mes sopratuom, ka anus rėk išneštė i lauka, ka po žuolė pasėvakštuioto. Vo kėik aš privargau, kol anus vėsus suveiziejau!.. Dėdlė mon padiejė ė draugė, ė babūnė. Dā ė mūsa šou Mosis katėnelius ganė. Katėnelė baisė daug jiedė, lakė pėina, diel tuo grėtā auga. Kumet anims jau bova beveik do mienėsė, aš pradiejau ėiškuotė naujū gaspaduoriu. Tėp ė prasėdiejė mona vargā. Dėdlė bova gaila anus kam nuors atėdoutė. Bet jug nagalieju laikītė tėik katėnū! Diejuo skelbėmus i interneta, siūluojau draugams, mama siūlė sava pažīstamims. Tėp, per dėdėlius vargus, ketorė katītė iškeliava i kėtus nomus. Vėinuos, dėdlė dailiuos katėlės, nikāp niekam nebisiūliem. Mona dėdlem džiaugsmou, anou pasėlėka babūnė. Daviem varda Šeba. Vo ka jūs būtomėt matė, kap anou muotina Mīcė muokė vėsuokiu muonu!.. Joukās lioubam nasėvertė, kumet ana isėlėp i trešnė, isėviliuo vāka, vo pati pabieg. Vo, ė būk godros – nušuok žemīn!

Mona katelė jau šėik tėik prakota. Aiško, ana ė dabā pridėrb vėsuokiu špuosu. Vėina dėina babūnė nikāp nagaliejė soprastė, ėš kor varanduo atsirond medė lapu. Tik spie iššloutė, vo anū viel atsėrond. Vieliau ana pamatė, ka ė Šeba tuokės duovėnas neš nomėi. Parvelk na tik lapu... Parneš ė peliū – tėp prisėded pri maista. Nasenė bovuom ė dėdlė sopīkė: Šeba ėsėlinda i truobuos pastuogė ė, krėsdama žemīn solaužė kelės plastėkėnės lėntalės. Tetis so babūnė bova pradiejė bombietė ont Šebā. Ta atėjė, nulėdosi oudėga, pasėglaustė aplink kuojės, gailė pakniaukė... Ė kāp ont anuos ėlgā pīksi – jug tuoki meili, tuoki daili ė dā mona patiuos užauginta.